

შუახევის მუნიციპალიტეტის მერიისთვის საბიუჯეტო ინიციატივები

წინამდებარე დოკუმენტი წარმოადგენს ადამიანის უფლებების სწავლებისა და მონიტორინგის (EMC) მიერ შემუშავებული საბიუჯეტო რეკომენდაციების პაკეტს შუახევის ადგილობრივი თვითმმართველობის ორგანოებისთვის.

უნდა ითქვას, რომ აღნიშნული ხედვები და რეკომენდაციები უკანასკნელი 1 წლის განმავლობაში მუნიციპალიტეტის ცენტრსა და სოფლებში არსებული სოციალური და უფლებრივი მდგომარეობის სისტემური შესწავლას და ადგილობრივი თემის ლიდერებთან და აქტივისტებთან აქტიური კონსულტაციებს ეფუძნება.

ბოლო 1 წელზე მეტია EMC აქტიურად მუშაობს მაღალმთან აჭარაში, კერძოდ კი ხულოს, შუახევის და ქედის მუნიციპალიტეტში მცხოვრები მოსახლეობის საჭიროების კვლევის და სამართლებრივი დახმარების აღმოჩენის კუთხით. ჩვენი მუშაობა ადგილობრივ მოსახლეობასთან ინტენსიურ კომუნიკაციას და მხარდაჭერას გულისხმობს და დოკუმენტში წარმოდგენილი რეკომენდაციებიც სწორედ ადგილობრივი თემის საჭიროებებს, წუხილებს და გამოწვევებს ეფუძნება.

წინამდებარე რეკომენდაციები შეესაბამება ადგილობრივი თვითმმართველობის მანდატს და ფინანსურ შესაძლებლობებს, რაც ამჟამინდელი მოცემულობით გვესმის, რომ საკმაოდ შეზღუდულია. ამის მიუხედავად, მიგვაჩნია, რომ მუნიციპალური ორგანებს რომლებიც სახელისუფლებო უფლებამოსილებებს ასრულებენ ადგილობრივ დონეზე, აქვთ შესაძლებლობა უკეთ დაინახონ მოსახლეობის სოციალური საჭიროებები, მაქსიმალურად ასახონ ეს საჭიროებები ადგილობრივ ბიუჯეტში და შეიმუშაონ ამ საჭიროებებზე მორგებული სოციალური პოლიტიკა. ჩვენს მიერ შემუშავებულ რეკომენდაციებში შევეცადეთ უპირველესად ამ ტიპის საჭიროებები წარმოგვედგინა.

იმედს გამოვთქვამთ, რომ შუახევის საკრებულო ბიუჯეტის შემუშავების პროცესში მხედველობაში მიიღებს ქვემოთ წარმოდგენილ რეკომენდაციებს და მას საკუთარი პოლიტიკისა და სოციალური პრაქტიკის ნაწილად აქცევს.

1. კოვიდ-19 პანდემიის შესახებ საინფორმაციო პოლიტიკის გაძლიერება

მუნიციპალიტეტის ვებ-გვერდის, სოფლებში არსებულ სხვადასხვა მუნიციპალურ სივრცეებში (ბიბლიოთეკა, კულტურის ცენტრები და სხვა) კოვიდ-19 პანდემიის შესახებ საინფორმაციო მასალის განთავსება. საინფორმაციო მასალა სასურველია შეიცავდეს ინფორმაციას დაავადებათა კონტროლის ცენტრის მიერ მომზადებულ სამედიცინო რეკომენდაციებს ვირუსისგან თავის დასაცავი აუცილებელი ზომების შესახებ, ვირუსით დაავადებით გამოწვეულ ჯანმრთელობის რისკებზე, სახლში მკურნალობისთვის აუცილებელ რეკომენდაციების შესახებ.

საქართველო პანდემიის მეორე ტალღის პირობებში იმყოფება. ვითარება საკმაოდ რთულია აჭარაში, რომელიც უკვე არა ერთი კვირა თბილისის შემდეგ ვირუსის გავრცელების ყველაზე დიდი კერაა. აშკარაა, რომ გავრცელების ასეთი მაჩვენებელი გამოწვეულია აუცილებელი რეკომენდაციების გაუთვალისწინებლობით მოსახლეობის მიერ. ამის ერთ-ერთი უმთავრესი მიზეზი კი შესაძლოა იყოს ინფორმაციის ნაკლებობა. განსაკუთრებით სოფლებში, სადაც ინტერნეტთან წვდომა გართულებულია. ამ ვითარებაში ადგილობრივი თვითმმართველობის კოდექსის მე-16 მუხლის მე-4 ნაწილის თანახმად, მუნიციპალიტეტი უფლებამოსილია იმოქმედოს ჯანმრთელობის დაცვის მიზნით სახელმწიფო პოლიტიკის გამტარებელ ორგანოსთან შეთანხმებით. შესაბამისად, მუნიციპალიტეტი უფლებამოსილია კორონა ვირუსთან დაკავშირებით მოქმედ უწყებათაშორისი საკოორდინაციო საბჭოსთან კოორდინაციით მიაწოდოს ინფორმაცია მოსახლეობას პანდემიასთან დაკავშირებული საფრთხის და ამ საფრთხესთან გამკლავების საშუალებების შესახებ.

რეკომენდაცია: კოფიდ -19 ვირუსთან დაკავშირებული ჯანმრთელობის საფრთხის, მისგან თავდაცვის აუცილებელი ზომების შესახებ საინფორმაციო დაფის განთავსება მუნიციპალიტეტის ყველა დასახლებულ პუნქტში და პროაქტული საინფორმაციო კამპანიის ორგანიზება.

2. სოციალური სერვისების შესახებ მოსახლეობის ინფორმირებულობის გაზრდა

რეკომენდაცია: მოსახლეობის მოწყველადი ჯგუფების უმთავრესი საჭიროებების იდენტიფიცირება, სოციალური სამსახურის თანამშრომლების კვალიფიკაციის ასამაღლებელი აქტივობების ორგანიზება და მოქალაქეებისთვის ხელმისაწვდომი სოციალური სერვისების შესახებ ინფორმაციის პროაქტული კამპანიური გავრცელება.

3. ერთ-ერთი ყველაზე დიდი მოწყვლადი ჯგუფებისთვის - შემ პირებისთვის საცხოვრებელი სივრცის აღაპტირების საჭიროების განსაზღვრა მუნიციპალიტეტის ბიუჯეტში

შმშ პირებისთვის საჭირო სერვისების უზრუნველყოფისთვის აუცილებელია სახელმწიფო და ადგილობრივი თვითმმართველობის ორგანოების, ასევე კერძო სექტორის ერთობლივი მუშაობა. თუმცა ამავდროულად შესაძლებელია მუნიციპალიტეტმა იზრუნოს შმშ პირების საცხოვრებელი გარემოს ადაპტირებაზე საკუთარი ფინანსური შესაძლებლობების ფარგლებში. აღსანიშნავია, რომ მსგავსი პრეცენდენტი არსებობს ქართულ პრაქტიკაში. მარნეულის მუნიციპალიტეტმა შეიმუშავა ე.წ. „ნათელი ოთახის“ კონცეფცია, რაც გულისხმობს სხვადასხვა საჭიროების შმშ პირების საცხოვრებელი სივრცის მორგებას მათ საჭიროებთან. შესაბამისად, შესაძლებელია მუნიციპალიტეტმა განსაზღვროს ყოველ წლიურად იმ შმშ პირების რაოდენობას, რომელსაც დაეხმარება საცხოვრებელი სივრცის ადაპტირებაში და განგრძობითად, ყოველ წლიურად გაითვალისწინოს ეს საჭიროება ბიუჯეტის დაგეგმარებისას.

რეკომენდაცია: შშმ პირებისთვის საცხოვრებელი პირობების გაუმჯობესებაზე და ადაპტირებაზე ორიენტირებული პროგრამების ამუშავება, რომელიც წინასწარ კვლევასა და შშმ პირებთან და მათ ოჯახებთან აქტიურ კონსულტაციებს დაიფუძნება.

4. ადმინისტრაციულ ცენტრებში სააფთიაქო ქსელის შეტყინის მხარდაჭერა

მუნიციპალიტეტის ცენტრის გარდა, თემებში, ხეობებში ფაქტობრივად არ არის ხელმისაწვდომი სააფთიაქო მომსახურება. უკანასკნელ პერიოდში განვითარებულმა მოვლენებმა ნათლად დაგვანახეს, რომ უმნიშვნელოვანესია ადამიანებს ხელი მიუწვდებოდეთ თუნდაც პირველადი მოხმარების მედიკამენტებზე; ჯანმრთელობის დაცვაზე ხელმისაწვდომობის უფლება, როგორც საქართველოს კონსტიტუციით, ასევე არაერთი ეროვნული თუ საერთაშორისო საკანონმდებლო აქტითაა გარანტირებული. საქართველოს თითოეული მოქალაქის უფლება მიიღოს ხარისხიანი და ხელმისაწვდომი სამედიცინო მომსახურება. ხელმისაწვდომობაზე საუბრობს „ჯანმრთელობის დაცვის შესახებ“ საქართველოს კანონი. ვინაიდან პიროვნების ჯანმრთელობა ადამიანის კეთილდღეობისა და ღირსების მნიშვნელოვანი შემადგენელი ნაწილია, სახელმწიფოში დაცული უნდა იყოს თითოეული მოქალაქის ჯანმრთელობა და იმავდროულად მოქალაქებს უნდა ჰქონდეთ ჯანმრთელობის მდგომარეობის გაუმჯობესების შესაძლებლობა. სამედიცინო მომსახურების ხელმისაწვდომობის საკითხზე საუბრობს, ადამიანის უფლებათა საყოველთაო დეკლარაცია და განსაზღვრავს, რომ ყველა ადამიანის აქვს უფლება ცხოვრების ისეთ დონეზე, რომელიც ადეკვატური იქნება მისი და მისი ოჯახის ჯანმრთელობისა და კეთილდღეობისათვის, საკვების, ტანსაცმლის, საცხოვრებელი ადგილის, სამედიცინო დახმარების და აუცილებელი სოციალური სამსახურების ჩათვლით. აღნიშნული დათქმა უფრო ვრცლადაა განმარტებული, საქართველოს მიერ რატიფიცირებული, ევროპული კონვენციით - „ადამიანის უფლებების და ბიო მედიცინის შესახებ“. რომლის მე-3 მუხლით განსაზღვრულია, რომ მთავრებმა, თავისი იურისდიქციის ფარგლებში, ჯანმრთელობის დაცვაზე მოთხოვნილებებისა და არსებული რესურსების გათვალისწინებით, უნდა გაატარონ სათანადო ღონისძიებები შესაფერისი ხარისხის ჯანმრთელობის დაცვის თანაბარი ხელმისაწვდომობის უზრუნველსაყოფად კონვენცია განსაკუთრებულ ყურადღებას ამახვილებს მოწყვლად ჯგუფებზე და მათთვის სამედიცინო მომსახურების მიწოდების პრიორიტეტულობაზე. ევროპის საბჭოს მინისტრთა კომიტეტის რეკომენდაცია (Rec -2006/18) - „წევრი სახელმწიფოების მიმართ მრავალ კულტურულ საზოგადოებაში ჯანმრთელობის სერვისების შესახებ, ეს რეკომენდაცია მოიცავს მულტიკულტურულ მოსახლეობაში ჯანმრთელობისა და ჯანდაცვის ხელშეწყობის სტრატეგიებს. მათ შორის: დისკრიმინაციის აკრძალვა და პაციენტის უფლებათა პატივისცემა; ჯანდაცვის თანაბარი ხელმისაწვდომობა; ენთბრივი ბარიერების გადალახვა; ეროვნულ უმცირესობათა ჯანმრთელობის და სოციალურ-ეკონომიკურ საჭიროებათა მიმართ მგრძნობელობა; უფლებების გაზრდა; უფრო მეტი მონაწილეობა და სათანადო საინფორმაციო ბაზის განვითარება მრავალკულტურული მოსახლეობის ჯანმრთელობის საკითხებზე.“

რეკომენდაცია: ბიუჯეტში გათვალისწინებული იქნას შესაბამისი რესურსები, რათა თვითმმართველობის ორგანოებმა შეძლონ სააფთიაქო ქსელებთან/კომპანიებთან ადვოკატირების პროცესის ორგანიზება მუნიციპალიტეტის სოფლებში აფთიაქების ქსელის გახსნის მიზნით. მათ შორის, თვითმმართველობის მხარდაჭერა შეიძლება გულისხმობდეს შესაბამის სააფთიაქო კომპანიისთვის სიგრცის უსასყიდლოდ დათმობას.

5. მიწის რეგისტრაციის პროცესის მხარდაჭერა

მიწის რეგისტრაციის პროცესის გაჭიანურება იყო ერთ-ერთი მნიშვნელოვანი საკითხი, რათა უკმაყოფილება გამოხატა მოსახლეობამ. გასათვალისწინებელია, რომ ადგილობრივი თვითმმართველობის კოდექსი ანიჭებს უფლებამოსილებას მუნიციპალიტეტის იმოქმედოს სოფლის მეურნეობის მხარდასაჭერად. მიწის რეგისტრაციის პროცესის დაჩქარება ერთ-ერთი შესაძლებლობაა მუნიციპალიტეტის მხრიდან სოფლის მეურნეობის მხარდასაჭერად.

ამ მიზნით ასევე მნიშვნელოვანია თვითმმართველობის დონეზე მოხდეს მიწის რესურსის, საკუთრების, გადანაწილების, დეფიციტის, ეკოლოგიური რისკების კვლევა და მასზე დაფუძნებით მომავალში მიწის პოლიტიკის შემუშავება.

რეკომენდაცია: მიწის რესურსების კვლევის ჩატარებისთვის საჭირო საბიუჯეტო რესურსების მობილიზება. ასევე ყველა შესაძლო ფინანსური და ინსტიტუციური პირობა შექმნა თვითნებურად დაკავებულ მიწაზე საკუთრების უფლების აღიარების კომისიისთვის საკუთარი უფლებამოსილების შეუფერხებელი განხორციელების მიზნით. ეს

მათ შორის შესაძლოა გულისხმობდეს სხვადასხვა ლოჯისტიკური ხარჯებისთვის დამატებითი ფინანსების უზრუნველყოფას.

6. ახალგაზრდული ინიციატივების მხარდაჭერა

მუნიციპალიტეტის მიერ ახალგაზრდული პოლიტიკის შემუშავება, მისი აქტიური კულტურული დიალოგის შესახებ დისკუსიას/კოორდინაციას, მულტიკულტურული გარემოს შექმნას და მუნიციპალიტეტის საქმიანობაში ახალგაზრდების ჩართულობას წაახალისებას.

ახალგაზრდულ საკონსულტაციო მექანიზმებს არსებითი მნიშვნელობა აქვს პოლიტიკურ დღის წესრიგში ახალგაზრდების საჭიროებების, უფლებების და ინტერესების დასაყენებლად და გადაწყვეტილებების მიღების პროცესზე მათი გავლენის გასაზრდელად. ამავე დროს, საკონსულტაციო მექანიზმები დიალოგის, მშვიდობისა და სოლიდარობის ხელშემწყობი სივრცეებია და მას მნიშვნელოვანი სოციალური დატვირთვაც გააჩნია. ადგილობრივი თვითმმართველობის კოდექსით გათვალისწინებული მოქალაქეთა მონაწილეობის მექანიზმები მიზნად ისახავს ყველა მოქალაქის, მათ შორის, ახალგაზრდების საჭიროებების და წუხილების მუნიციპალიტეტში გადაწყვეტილების მიმღებ პირებამდე მიტანას. თუმცა, უნდა ითქვას, რომ აღნიშნული მექანიზმები ადგილობრივ დონეზე სუსტად მუშაობს და რეალური მონაწილეობის და დემოკრატიის პლატფორმებად არ არის ქცეული.

რეკომენდაცია: მუნიციპალიტეტია შეიმუშაოს ახალგაზრდული პოლიტიკის სტრატეგია და დაგეგმოს გრძელვადიანი მოქმედებები ახალგაზრდული ინიციატივების მხარდასაჭერად, მათ შორის მცირე გრანტების გამოყოფის და ამ გრანტების განაწილების პროცესში ახალგაზრდული საბჭოების მონაწილეობის გზით.

7. ქალთა საჭიროებების კვლევა და ქალთა პოლიტიკური წარმომადგენლობის გაძლიერება

ქალების წარმომადგენლობითობა გადამწყვეტია მუნიციპალიტეტში გენდერულად სენსიტიური პოლიტიკისა და სერვისების ჩამოსაყალიბებლად, ვინაიდან ქალ პოლიტიკოსებს შეუძლიათ ადვოკატირება გაუწიონ ქალთა საკითხებს. აღნიშნული განსაკუთრებულად მნიშვნელოვანია ადგილობრივი ხელისუფლების შემთხვევაში. ვინაიდან იქამდე, სანამ ქალები არ ჩაერთვებიან მუნიციპალიტეტის, ადგილობრივ დონეზე პოლიტიკის შემუშავებასა და გადაწყვეტილების მიღების პროცესში, ცვლილებები ქალთა პოლიტიკურ და სოციალურ-ეკონომიკურ მდგომარეობაში, უმეტეს შემთხვევაში, მინიმალური იქნება. მოსახლეობასთან შეხვედრებისას ადგილობრივი ქალები აღნიშნავდნენ, რომ ისინი ნაკლებად მონაწილეობენ სოფლის კრებებსა თუ მუნიციპალიტეტის მიერ ორგანიზებულ სხვადასხვა შეხვედრებში.

გაეროს დამფუძნებელი დოკუმენტი, გაეროს ქარტია, მოიცავს საჯარო და პოლიტიკურ ცხოვრებაზე ქალთა ხელმისაწვდომობის საფუძვლებს: თანასწორობის უფლებისა და დისკრიმინაციის აკრძალვის პრინციპს. ადამიანის უფლებათა საყოველთაო დეკლარაცია ასევე იცავს წებისმიერ ადამიანს ყველა სახის დისკრიმინაციისაგან, მათ შორის სქესის ნიშნითაც. საერთაშორისო კონვენცია ეკონომიკური, სოციალური და პოლიტიკური უფლებებისთვის და საერთაშორისო კონვენცია ეკონომიკური, სოციალური და კულტურული უფლებებისთვის ორივე ეს დოკუმენტი ადამიანის უფლებათა საყოველთაო დეკლარაციიდან გამომდინარეობს და აყალიბებს კიდევ უფრო მეტად სპეციფიკურ შეთანხმებას თანასწორობის უფლებაზე ქალსა და კაცს შორის, საჯარო და პოლიტიკურ ცხოვრებაში. საქართველომ, დათქმების გარეშე, მოაწერა ხელი და რატიფიცირება მოახდინა ქალთა მიმართ ყველა ფორმის დისკრიმინაციის აღმოფხვრის შესახებ კონვენციას და აიღო ვალდებულება, რომ არა მხოლოდ სერიოზულ ზომებს გაატარებს დისკრიმინაციის აღმოსაფხვრელად, არამედ დაიცავს ქალებს და შეუწყობს ხელს თანასწორობის

პოპულარიზებას საკანონმდებლო, საჯარო ინსტიტუტების, სხვადასხვა ორგანიზაციისა და ინდივიდუალური პირების დონეზე.

მნიშვნელოვანია მუნიციპალიტეტმა დამხმარე როლი მაინც შესაბამისი სივრცის გამოყოფით) ქალთა საჭიროებების შესახებ ადგილობრივი ქალებისთვის საინფორმაციო შეხვედრების, ტრეინინგების გასამართად. მუნიციპალიტეტის მიერ პროაქტიული ინიციატივის გამოვლენის შემთხვევაში შესაძლებელია სხვადასხვა ფორმატის გამონახვა ადგილობრივ და საერთაშორისო ორგანიზაციებთან თანამშრომლობით ქალების ინფორმირებისთვის ისეთ მნიშვნელოვან თემებზე როგორიცაა: ოჯახის დაგეგმვა, რეპროდუქციული საკითხები, ოჯახური ძალადობა, ქალთა პოლიტიკური მონაწილეობა და ორგანიზება. ასევე არაერთი ქვეყნის გამოცდილება მოწმობს, რომ მნიშვნელოვანია ბიუჯეტირების პროცესი წარიმართოს გენდერულად სენსიტიურ ჭრილში. რაც გულისხმობს, ამა თუ იმ სექტორში, სადაც უნდა გამოიყოს საბიუჯეტო თანხები, მუნიციპალიტეტმა განახორციელოს გენდერული სიტუაციის ანალიზი კაცებთან, ქალებთან, გოგონებთან და ბიჭებთან მიმართებაში. ასევე მოახდინოს პოლიტიკური სიტუაციის გენდერული მახასიათებლების და გამოყოფილი თანხების გაანალიზება, რათა განისაზღვროს არის თუ არა ის საკმარისი გენდერულად სენსიტიური პოლიტიკის გასატარებლად. მუნიციპალიტეტმა ასევე სასურველია მოახდინოს შედეგების შეფასება, რაც მოიცავს პოლიტიკისა და სახსრების ხარჯვის შედეგების შეფასებას და განსაზღვრას, თუ რამდენად მოახდინა ბიუჯეტირების პროცესმა ზეგავლენა მთავრობის გენდერულ თანასწორობასთან დაკავშირებულ ვალდებულებებზე.

რეკომენდაცია: ქალთა ოთახის საბიუჯეტო დაფინანსების გაზრდა, ბიუჯეტის დაგეგმვის პროცესში გენდერული საჭიროებების გათვალისწინება, მათ შორის სოფლის კრებებზე ქალთა აქტიური დასწრების და მონაწილეობის უზრუნველყოფით.

8. ადგილობრივი მნიშვნელობის კულტურის ძეგლების მოვლა-შენახვა

EMC-ის პოზიციაა, რომ მუნიციპალიტეტის როგორც საჯარო ორგანოს ბიუჯეტი არ უნდა იყოს გამოყენებული რელიგიური საქმიანობისთვის და მიზნებისთვის. თუმცა, თუ მუნიციპალიტეტის ტერიტორიაზე არსებულ კულტურული ღირებულების ისტორიულ, საკულტო ნაგებობას ემუქრება განადგურების საფრთხე, მუნიციპალიტეტი ადგილობრივი თვითმმართველობის კოდექსის მე-16 მუხლის მე-2 მუხლის „ტ“ ქვეპუნქტის თანახმად, უფლებამოსილია იზრუნოს ამ კულტურული ღირებულების საკულტო ნაგებობების მოვლა-შენახვაზე, ასევე მის რეაბილიტაციაზე არსებული საჭიროებიდან გამომდინარე. ზემო აჭარაში არსებული ძველი მეჩეთების უდიდესი ნაწილი მორწმუნე მუსლიმების მიერ იქნა აღდგენილი, რადგან ხელისუფლების ორგანოები სრულ პასიურობას იჩენდნენ წლების განმავლობაში მუსლიმი თემის სალოცავების აღდგენა-შენარჩუნების საქმეში, ხოლო ზოგ შემთხვევაში ხელსაც კი უშლიდნენ ამ საკულტო ნაგებობებისთვის თავდაპირველი დანიშნულების დაბრუნებას. შესაბამისად, საკონსერვაციო თუ სარესტავრაციო სამუშაოები ხშირ შემთხვევაში წარიმართა სპეციალისტების მონაწილეობის გარეშე. ასეთ შენობებს მართალია აქვთ შენარჩუნებული საკულტო დანიშნულება, თუმცა შეკეთებისას მრავალი მათგანის პირვანდელი იერსახე შეიცვალა. ადგილობრივი თვითმმართველობის ორგანოების ფუნქცია სწორედ ძველი საკულტო ნაგებობების იერსახის უცვლელად შენარჩუნება და მისი კულტურული ღირებულების გადარჩენაა. ამიტომაც, მნიშვნელოვანია მუნიციპალიტეტმა გამოიჩინოს ინიციატივა, ჩაერთოს ასეთი მეჩეთების შენახვის, რეაბილიტაციის პროცესში, რიგ შემთხვევაში ფინანსურად და შესაბამისი სამშენებლო მასალის უზრუნველყოფის მეშვეობით, ხოლო ზოგ შემთხვევაში დარგის სპეციალისტების მოწვევის და რესტავრაციის პროცესში ჩართვით, რათა შენობაში შეინარჩუნოს ავთენტურობა.

რეკომენდაცია: შუახევის მუნიციპალიტეტის სოფელ გორგაძეების მეჩეთის შენახვა-რეაბილიტაცია

ბუნებრივია, წინამდებარე რეკომენდაციებში წამოჭრილი საკითხების შესახებ მუნიციპალურ ორგანოებს სამუშაო გამოცდილებიდან გამომდინარე გაცილებით სიღრმისეული და ზუსტი წარმოდგენა გაქვთ. ჩვენი სურვილია მოვისმინოთ მუნიციპალიტეტის ხედვა აღნიშნულ საკითხებთან დაკავშირებით. ვიმედოვნებთ განიხილავთ ჩვენს მიერ წარმოდგენილ 8 რეკომენდაციას და მოგვეცემა შესაძლებლობა მივიღოთ მონაწილეობა ბიუჯეტის პროექტის საჯარო განხილვებში.